



擇里志乾

2488
2-1



2488
卷一

擇里志上

士大夫可居處

季子曰古無士大夫皆民也民有四士賢而有德國
君任之不仕者或為農或為工為商昔舜耕于歷山
陶於河濱漁於雷澤耕農也陶工也漁商也是以不
仕於君當歸於農工賈之民夫舜千古為民之法也
至治之極爾哉皆民鑿井耕田于于而樂尚有等級
名號之異哉世界之生久矣夫禮繁而名殊名殊而
等級多聖人之儀章度數至眾矣三代之時諸侯多
其世卿世大夫各以禮治其富貴而士之不仕者雖



不貴又守古聖人之法其治家修身苟力可及而無
害於僭則與卿大夫同所誦詩書而所業仁義禮樂
也於是士大夫之名出焉名立而塗異故農工賈遂
賤而士大夫之名益尊矣自秦滅封建天子一人外
凡仕於朝者與不仕而在下者苟其人從事於士則
通謂之士大夫而士大夫益多然此非上古之制也
故曰堯舜時士大夫為農工賈不恥則抑後世何憚
焉或欲以士大夫侮農工賈以農工賈羨士大夫則
皆不知本者也夫聖人之法豈惟士大夫可能農工
賈亦可能其果有不同者乎雖然後世人品不及於

古氣稟有賢愚術業有通塞士大夫或可為農工賈
而以農工賈為本業者不能為士大夫之事則於是
不得不以士大夫為重焉此亦後世自然之勢也是
故為士大夫者或游談而折衷一世之權或高蹈而
直抗萬乘之尊或混於耕牧圃陶賣炭賣藥之中無
所不通而貴賤惟意高下在心汪洋恣睢其誰能禁
之哉然則天下之至美好者士大夫之名也然其所
以不失士大夫之名者以其守古聖人之法也毋論
其為士為農為工商當修士大夫之行而此非禮不
能禮非富不立故於是守不得不立家置業以四禮

為仰事俯育保支門戶之計是以作士大夫可居處
蓋時有利不利地有善惡人有進退出處之異也
我國寧有士大夫中原除五胡裔皆以帝王聖賢之
後惟堯舜文武周孔之法制此為真士大夫乃我國
所謂士大夫皆本國人之苗裔耳我國處中華之外
不及叅於禹貢錫姓之時即一東夷也但箕子之後
為鮮于氏高勾麗為高氏新羅諸王朴昔金三姓及
駕洛國君金氏皆以王者自命其姓此為貴種自新
羅未通中國而始制姓氏然仕官士族略有之民庶
則皆無有也至高麗渾一三韓始倣中國氏族頒姓

於八路而人皆有姓焉然未頒之前派族各異故但
擇其同貫為同姓若他邑則姓雖同不以為族而婚
娶無禁以祖先不同故也然則高麗賜姓何有尊貴
者今世士大夫欲持是而妄相物我則惑矣我朝
開運以名分立國至今士大夫之名甚盛而衆用人
專取門閥故也人品層級甚多宗室士大夫為朝廷
搢紳之家下士夫則為鄉曲品官中正功曹之類下
此為將校祿官美負醫官方外閑散人又下者為吏
胥軍戶良民之屬下此為公私賤奴婢矣自奴婢至
京外吏胥為下人一層也庶孽及雜色人為中人一

層也品官與士大夫雖同謂之兩班然品官一層也
士大夫一層也士大夫中又有大家名家之限名目
甚多婚娶交游不相通其拘碍促刺如此不能無感
衰之理存亡之變故士大夫或夷為平民平民久遠
則或昇漸為士大夫者矣故鮮于氏為平安品官今
無士大夫昔氏高氏絕種有新羅朴氏金氏及駕洛
金氏為王者後至今貴顯繁盛此二姓方為本國中
甲族且中國人亦多留種於此者有隨箕子衛滿而
來者有隨麗王妃公主而來者麗元混為一國人民
往來無禁亦有遷徙而仍居者此則雖非高麗賜姓

然其派系未詳亦少顯者至於自中國流落而為顯
家者如溫陽之孟延安之李南陽之洪驪州之李原
州之元海州之吳宜寧之南居昌之慎昌原之黃不
入於此中其餘皆高麗賜姓耳故今世士大夫考其
譜而起始祖多出此中然物久則難變自高麗至今
八百餘年由卑賤至尊貴以尊貴傳襲累世其德行
功業又足以光史乘傳簡冊則此豈下崔盧王謝之
後哉我 朝比麗尤文明昔 莊獻大王以聖人之
資蒞君師之位東一世於禮法名教之中於是士大
夫家家文章戶戶道德彬彬然文彩與 皇朝士大夫

一樣是故才學鹵莽則謂之儻楚婚娶以失則待以
荒外行義有玷則不齒交游而介冑之夫商賈之人
雖出於士夫中亦賤之矣故為士大夫自難必攻文
學力行禮義修身齊家然後方可行於世耳是以出
處隱顯之間動靜語默之節皆被人指目自 莊獻
大王至 宣祖二百年來時有汚隆人不能盡善於
是乎偏論大作自偏論產出來賢者未必服人不肖
者易以藏身士大夫行身立名尤難蓋我國制雖優
重士大夫亦輕用殺戮故無良者得志輒借國刑以
報私怨而搢紳之禍屢作無名則見棄得名則見忌

忌則必殺之而後已誠難仕之國也及其衰也是非
之爭大爭大而讐深讐深而互而殺戮加之嗚呼士
大夫不得於朝山林而已此誼通古今而今則不然
不幸戊申諸賊其身則以士大夫從鄉邑首事故莫
除之後朝廷每起山林幽僻有大賊窺殺不疑其為
盜則又疑其心跡加以詭僻之名欲進而仕於朝則
刀鋸鼎鑊之爭紛然未已也欲退而處于野則非無
青山萬疊綠林千重卒未易往士大夫於是乎將安
歸乎不惟山林不可往一言語一行事之間其見疑
不在於品官與中人下人每在於士大夫而毋論其

顯晦用舍與在野在朝殆無所容身至此咸悔其讀書作業為士大夫而反有羨於農工賈之名則前日士大夫蠢然自尊於農工賈之上到今真有所不及物極則反固其理也故普天之下一名士大夫則無所可往其將舍士大夫之名而居於農工賈或可以安身立名歟曰否今日偏論之害不唯在於士大夫從品官中人至及於輿儻下賤各以其所與好者不免人之指目抑農工賈獨無所相好者乎斯人也既不能木石禽獸而與斯人也同處於斯世則舉目擡頭即與物接夫惟接物生親疎生好惡親與好生向合

疎與惡生離背一名向背離合則便有界限彼亦不能入此亦不能出雖欲左右壅斷於中不可得矣惟此界限大固斯人非山河而堅於鐵石無方所而確有定位無有一人能自解免於此中此今世偏論之形耳惟此偏論初生於士大夫末流之弊至使人無所相容古語云火生於木火發必尅故曰東亦不可居西亦不可居南亦不可居北亦不可居如此則將無地無地則無東西南北無東西南北則便一混淪太極圖也如此則無士大夫無農工賈亦無可居處矣此謂非地之地於是乎作士大夫可居處

崑崙山一枝行大漠之南東為醫巫閭山自此大斷
是為遼東之野渡野起為白頭山即山海經所謂不
咸山也精氣如走千里挾二江向南為寧古塔南後
抽一脉為朝鮮山脉之首有八道曰平安隣瀋陽曰
咸鏡隣女真曰江原承咸鏡曰黃海承平安曰京畿
在江原黃海之南京畿南則曰忠清及全羅全羅之
東即慶尚也慶尚即古新羅卞韓辰韓地京畿忠清
全羅即古馬韓百濟地咸鏡平安黃海即古朝鮮高
句麗地江原別為濊貊地其興滅未詳唐末王太祖
建出而統合三韓為高句麗而我 朝繼運矣東南

西皆海獨北一路通女真遼瀋多山小野其民柔謹
局促長亘三千里東西不滿千里際海而南者可直
浙江吳會之間平安之北義州為界首邑約可當青
州國大抵在日本中國之間古堯時有神人化生於
平安道价川縣妙香山檀木下石窟中名曰檀君遂
為九夷君長年代子孫不可記後箕子出封於朝鮮
都平壤至孫箕準秦時為燕人衛滿所逐浮海遷都
於全羅蓋山郡獬為馬韓箕氏地界不詳於史氏而
與辰韓卞韓是為三韓赫居世興於漢宣帝時盡有
慶尚道六十七官臣服辰卞諸地獬新羅都慶州朴

昔金三姓更迭而為王衛氏亡於漢武帝時及漢移
民棄地有朱蒙者自靺鞨據平壤稱高句麗朱蒙
沒其次子溫祚又分據漢水以南滅馬韓號百濟都
扶餘高句麗與百濟俱滅於唐高宗時唐兵棄地撤
去二國地盡入新羅末為弓裔甄萱所分至高麗一
之此我國建置沿革之大畧也新羅以前三國戰爭
不休然文蹟少自高麗始可述矣高麗時士大夫之
名未大立多起自胥吏而為卿相者一為宰相則其
子與孫為士大夫咸置家於京城京城遂為士大夫
淵藪而外邑人罕有登於朝者及雙冀制科取士外

方人稍稍得顯仕於朝然西北多武臣東南多文士
矣及季世文風大振間有中中原制科者此通元之
效也至今以大族稱於世者多高麗卿相之後裔則
士大夫之胄沁東歷自高麗始可述矣

平安道在鴨綠南沮水北為箕子所封地舊界踰鴨
綠至青石嶺唐史所稱故安市白巖在其間自高麗
初淪失於契丹以鴨綠為限平壤為監司所治在沮
水上實為箕子所都以箕子故於九夷風氣先開箕
氏都千年衛氏及高氏都八百餘年至今為一國重
鎮者又千年地尚有箕子井田遺址及箕子墓 國

家以鮮于氏為箕子子孫建崇仁殿於墓傍以鮮于
氏世襲殿官奉祀如中原之曲阜孔氏且江山奇絕
朱蒙時古蹟甚多然語多吊詭不可信城在江上絕
壁上有練光亭江外遙山遠控於濶野長林之外明
媚秀嫩不可名狀高麗詩人金黃元登亭終日沉思
只得一聯曰長城一面溶溶水大野東頭點點山而
思涸不復續仍痛哭而下此最可笑詩亦非佳句
皇朝時朱之蕃奉使至登亭叫弮稱快手寫天下第
一江山六字揭額及丁丑清皇帝回軍日見之以為
中原有金陵浙江比安得為第一令人打破而已惜

其善書只令鉅去天下二字循亭以北有清流壁壁
盡處有浮碧樓在城隅永明寺前 明廟朝許荷谷
筭為儒生時與儕友往游且約監司之婿大張妓樂
於樓上監司夫人怒其婿挾妓行樂囑監司遣隸平
畫拿諸妓囚之荷谷踉蹌敗歸作春游浮碧樓歌一
篇以嘲之一時盛傳監司以此見棄於世地雖宜五
穀綿絮小陂隄溪澗只事田種然惟下流有碧只島
在江中水縮泥生土人為水田其中水皆畝種江出
於白頭西南行三百里至寧遠郡大而為江至江東
縣與陽德孟山之水合至浮碧樓前為大同江江南

危十里長林官禁樵牧自箕子時至今繁盛每春夏
綠陰掩映不見天日平壤東為成川府卽松壤國為
朱蒙所併邑治在江上而光海壬辰時奉 廟社主
避亂於府中及卽位使府使朴燁大佐降公樓於客
館傍樓為三百餘間結構宏壯為八道樓觀之首前
有紇骨山十二峯然石色不雅江旣淺波野又狹隈
視平壤迥不及矣然光海以燁為能擢為平安監司
時值滿州作梗西路多事燁有材請光海倚以為重
凡十年不遷燁多用貨善用間巡到龜城適清兵圍
城夜半有一胡人踰城入燁寢所附耳語而去明朝

燁令人持酒往犒又以牛肉作長串炙頒於軍卒而
不羸不縮恰當軍數胡將大驚怪以為神也卽講和
解去癸亥間燁裨將一人請問說以朝廷將敗公主
上罷臣必與其禍不如暗結於清若朝廷有事則納
地割據足以自存不然則難乎免矣燁曰吾文官也
豈可作反臣不聽其人卽棄燁而逃未幾 仁祖反
正卽發使斬燁於任所平壤西百餘里為安州臨清
川江上有百祥樓樓傍有七佛寺高麗時隋兵至江
上有七僧前渡水不沒膝隋兵隨而長驅先鋒一陣
潰焉兵退而僧仍不見土人德之建寺祀之安州東

北為寧邊府因山為城峻絕險固弭為鐵瓮平安一
道惟此可以保障府北為劔山嶺即高句麗九都城
遺址尚在自此踰二大嶺為江界府府東至白頭山
為五百餘里其間有廢四郡茂昌閭延虞芮慈城等
地世宗朝革屬江界府移民空其地今樹木叅天
為絕峽多產人蔘每夏秋許民入採輸官充貢賦故
江界弭為國中產蔘之邑府西為渭原地有明孝成
梁祖地成梁父渭原人殺人逃入廣寧生成梁李如
松常曰俺本朝鮮人云渭原西有六邑義州為界首
而綽穀通瀋之路邑治在鴨綠江上江外二大水自

胡地東北來會至邑北別為三江每水潦漲溢三江
合一入海水中為威化島麗末崔瑩勸禍攻遼挾禍
至平壤使我太祖大王將兵六萬次威島時向威
夏太祖順軍心三疏請罷兵瑩不聽太祖仍與
諸將議回軍誅瑩一軍樂從遂回軍瑩聞變與禍走
太祖尾至圍宮城執瑩誅之廢禍父子立恭讓王末
樂禪代大率清川以南則謂清南地形東西狹以北
則謂清北地形東西延袤甚廣一道東近嶺脊山多
而平地少且乏川澤可灌溉故水田絕小野皆田穀
箕氏高氏之盛地狹民多夷山開墾及屢為漢兵所

徙地多荒廢且王氏混一後民多流下三南至今野
廣人稀少山耕矣西則近海諸邑多障潮為水田而
然視田則少故一道米價常翔貴於三南矣俗事桑
麻織作魚鹽絕貴雖臨海邑煮鹽處不多地不產竹
柿芋楮清北則地又高寒近塞故亦無花果而物產
甚稀少民多皆竊偷生唯平壤安州二邑為大都會
市裕燕貨商賈隨使臣往來者每獲奇贏多富豪者
且清南近內地俗尚文學清北則俗椎魯尚武惟定
州多登科文士

平安之東白頭大脉南下截天為嶺嶺東即咸鏡道

為古沃沮地南限鐵嶺東北限豆滿江長過二千里
逼海而東西未滿百里舊屬肅慎至漢屬玄菟後為
朱氏所據及亡為女真所據高麗則以咸興南定平
府為界至中葉使尹瓘將兵逐女真過豆滿江六百
里至先春嶺為界後復歸地于金以咸興為界至我
朝 莊獻大王使金宗瑞北拓地千餘里至豆滿江
設六鎮及兵營於江邊而女真窟穴之在白頭東南
者舉人版圖矣 肅廟丁酉康熙皇帝使穆克登登
白頭山審定兩國地界沿豆滿至會寧雲頭山城見
城外大坂有衆塚而土人指謂皇帝陵克登令人掘

開塚傍得碣上書宋帝之墓四字克登仍令大其封
築而去始知金人五國城卽雲頭山也但云宋帝不
知是徽是欽雲頭距東海莖二百里而海道密通高
麗且高麗全羅道與杭州隔一小海風便七日可通
若令宋高宗陰厚高麗使高麗從東海發船以千人
陸襲雲頭奪取徽欽與邢后遵海登陸而自全羅泊
杭州則此天下一奇事惜乎高宗意不在父而徒溺
西湖游宴之樂其不孝之罪可謂通天矣此千古之
大恨也然高宗則死未百年卽速賊僧發塚之禍徽
宗則雖死葬他鄉至今得保丘壠天道之回次未可

知如此矣土人耕於坂上者往往得古彝尊爐鼎之
屬似宣和陵而餘則宮人從官之塚也土人傳豆滿
北十餘里又有皇帝陵此則似欽宗而不可詳也咸
興以北山川荒險風俗勁悍土寒地瘠穀惟粟麥少
糲稻無綿絮土人衣狗皮禦冬性耐飢寒一如女真
矣山饒貂裘民以貂裘換南商之綿布方得衣袴矣
然非富厚者不能也臨海饒魚鹽然海水清而悍下
多巖石魚鹽之味俱不及西海之醲厚咸興府為監
司所治始一道不知文學矣我十代祖敬憲公諱繼
孫成廟朝莅監司擇俊秀少年廩養而教以經史

行誼自是文學蔚興間有中科甲者土人謂破天荒
及敬憲公卒鄉人建祠俎豆之至今城臨君子河上
有萬歲橋橋長五里城南門上有樂民樓全攬一邑
勝與平壤練光亭相甲乙野曠邈接海風氣雄壯鷲
悍不及於平壤之秀嫩明麗野中有 太祖大王微
時古宅至今安畫像於其中朝家遣官守護以時致
祭為本朝豐沛於榆之鄉永興南百餘里為安邊府
在鐵嶺之北邑西北有釋王寺 太祖未登極時夢
背負三椽花飛鏡落問於僧無學對曰背負三椽者
王字也花飛終有實鏡落豈無聲 太祖大喜遂建

寺而名曰釋王大修水陸道場二日有五百羅漢現
相空中之應安邊西北德源境海上有元山村浦民
聚居以漁採為業而海道東北通六鎮六鎮及沿海
諸邑商船皆維泊於此凡漁鹽海菜海蔘細布輕氈
貂蔘棺槨之材皆於此地出貫故江原黃海平安京
城諸商賈日夜至集貨物委積為大都會民多以廢
著為業而致富厚者 朝家設倉於此地海運慶尚
之穀儲置於倉每北路玄荒又以時運列邑而為賑
資安邊東南有黃龍山上有龍湫泉石殊絕是為咸
江交界之處山南則歙谷縣也 太祖以將帥受王

氏禪代其佐命功臣又多西北猛將既得國遺命西
北人勿大用以故平安咸鏡兩道三百年無顯人或
有登科制者官不過縣令間有通臺侍者然亦罕惟
梔定平人李之蘊安邊人官二人得至亞卿鄭鳳壽
經海伯田百祿鏡城人二人則以武弁僅至兵使且國俗
重門闕京城士大夫不與西北人為婚娶平交西北
人亦不敢與士大夫抗禮而西北兩道遂無士大夫
士大夫亦無往居者惟咸徒魚氏青海李氏安邊趙
氏貫豐壤而國初並通顯官移居京城代有科第此
外無人是故平成二道不可居也

黃海道居京畿平安之間蓋白頭南脉至咸興府西
北攬為釗門嶺又南下為老人峙自此分二脉一南
行由三方峙少斷即起為鐵嶺一西南行由谷山為
鶴嶺鶴嶺又分三枝一從兌山金川止五剛松岳即
高麗故都一從新溪為平山綿岳茲為黃海一道之
祖而西為海州昌金首陽等山又下野為平岡而西
北轉為信川錐山又北回而止於文化九月山即檀
氏故都一從谷山遂安泰山峻嶺橫亘不斷為慈悲
嶺又為岳嶺西止於黃州棘城黃州在岳嶺之北與
平安道中和府接境州置兵馬節度營以捍蔽西來

之路而自黃州南踰岳嶺由鳳山瑞興平山金川四
邑以達開城是為南北直路直路之東遂安谷山新
溪光山等邑並在萬山中地險民囂洞峽陰邃多崔
蒲出沒自古鮮文學顯達者直路諸邑亦然惟平山
金川頗有士族之流寓者金川則合江陰牛峯二縣
為郡而舊有瘴近益甚不宜居平山亦有瘴然西綿
岳東麓有花川洞洞有高巔大塚謠傳清祖地其下
頗開野敞濶土地且饒沃故多富盛之村亦出顯達
之士慈悲嶺舊為通北大路自高麗末年廢慈悲長
養樹木以塞之開岳嶺路為南北大関然嶺脈不過

十里即斷為平岡岡盡而平原是為棘城之野高麗
時蒙兵避岳嶺由棘城入 仁廟朝清兵南襲我也
亦由棘城入棘城野東西廣十餘里西止於南五里
江下流通潮汐無冰若自慈悲築長城橫巨棘城江
岸則南北可以絕斷而為天塹矣然岳嶺與九月東
西對老人峙為一大水口而南五里江劃處一野之
中自南北注涇江江東則黃州鳳山瑞興平山江西
則安岳信川載寧文化也八邑大同俗而俱在綿岳
首陽之北土上腴宜五穀綿絮鉛鐵則山出而碁置
江東西岸皆夾水築長堤內皆水田粳稻一望無際

如中原之蘓湖矣且米之產於此者顆粒甚大體性粘潤異於他地內厨用為御供者只此地米也自首陽錐山為九月者雖時有高低實為大幹脊脊之外臨海為邑者南為海州海州之右為康翎麓津西為長淵府府之北為松永殷粟豐川止於長連與平安三和府隔一小海錐山一脉循長連南西走上於長山串峯密洞壑逶迤深阻自高麗視湖南卞山湖西安眠並為松田以備宮殿及舟船之用串北有金沙寺海汀皆沙荒沙極細如金色映日閃爍者二十里每隨風成峯崔嵬成削朝夕遷徙或峙於東或峙

於西倏忽左右游動不定然沙上塔廟壯麗而終不埋壓此實可怪或曰海龍所為沙中產海蔘形類防風每四五月中原登萊海船至者甚眾官發將吏逐之則浮海下碇俟無人上荒採蔘而去串下海中又產鰓魚及黑虫黑虫無骨只一塊黑肉如爪而全身有肉刺者即海蔘也中原人用以染皂緞鰓魚即漢書所謂王莽所啗者登萊雖有之味之珍厚不及我境產者故採海蔘時並採之以利重之故登萊船歲益增至頗為沿海民害八邑雖挾海為利土多瘠薄唯豐川殷粟土為上腴有造山一坪水田種一斗可

收數百斗少不下一百斗田亦如之又三南所罕也
然長洲以北南阻長山串唯北通平安道故穀絮至
賤佃夫下賤皆富厚而自稱謂士族矣長洲南大海
中有大青小青二島周圍頗廣元文帝竄順帝於大
青島順帝築室以居奉純金佛像一軀每日出時輒
祈禱返國未幾歸而登極遣工匠百餘人使中官監
役大建佛寺於海中首陽山中是為神光寺制作工
巧為一國之最中間災於火更建而殊不及古今島
廢無人樹木叅天順帝所種棠漆菜茹之屬自崇自
落於蓁莽之中而宮室階礎遺址宛然海州為監司

所治在首陽之陽而海水闔兩山間滙滄於面前山
外為一大湖土人謂之小洞庭潔城實據其勝頗有
臨眺之致昔李栗谷珥為監司得石潭泉石於首陽
山中罷官後築室講學京城及四方儒士多從之及
栗谷殁建祠俎豆於中門人子孫仍世居而奉其風
教文禮甲冠於一道及襄鄉人借學官分朋攻擊如
仇讐世目以惡鄉矣綿岳一枝送而東遠為延安白
川在海州東後西江之西寶輦江下流之北泰山洪
海大野長川萃會於此而直通潮汐平濶明秀如有
中原江淮間風氣最為可居亦有自京流寓之士族

矣但土瘠易旱不宜木綿居人喜以舟楫通江海之
利東通二道南通兩湖貿易常得奇羨大抵一
道處國都西北地隣平安咸鏡俗喜弓馬而鮮文學
之士介山海間有鉛鐵綿絮稻粱魚鹽之利故雖多
富厚者亦少士大夫家矣然野中八邑土既膏沃海
上十邑地多名勝亦非不可居之地地勢陡入西海
三面負海獨東一路當南北通行之大路然北有岳
嶺南阻重江表裏山河多巖險城郭又有沃野廬原
真天府用武之地也天下有事當為要衝爭戰之地
此其所短也

江原道在咸鏡慶尚間北隣黃海谷山兔山等縣西
南與京畿忠清二道相接嶺脊自鐵嶺南至太白山
橫亘如天際雲嶺之東有九郡曰歙谷北與咸鏡安
邊府接壤曰通川曰高城曰杆城曰襄陽曰江陵故
穢國所都曰三陟曰蔚珍曰平海南與慶尚寧海府
接境九郡皆在東海上南北相距數千里東西如咸
鏡未滿百里嶺脊既阻西北而東南並海遠通地勢
雖局促居太山下下野之山多低平明秀東海無潮
汐故水不渾濁蹄為碧海無汙港島嶼之遮蔽如臨
大澤平塘濶遠宏壯又地多名湖奇巖登高則滄海

茫洋入洞則水石窈窕景物實為國中第一樓臺亭
觀之勝國人號為關東八勝在歙谷為侍中臺在通
川為叢石亭在高城為三日浦在杆城為清澗亭在
襄陽為青草湖在江陵為鏡浦臺在三陟為竹西樓
在蔚珍為望洋亭九郡之西為金剛雪岳五臺頭陀
太白等山山海之間多奇勝處洞府幽深水石清潔
或傳仙靈異蹟土人重游宴其父老喜載妓樂酒肉
跌宕於湖山之間以此為大事子弟化之少治文學
亦以其絕遠於二京自古少顯達者唯江陵頗出科
甲且土薄确甚水田種一斗莖收十餘斗唯高城通

川最多水田而亦不甚磽薄云次則三陟水田種一
斗收四十斗然三邑人物不產大都九郡皆濱海居
民專以漁採煮鹽為生雖土薄亦多富厚者但西嶺
太高如異域宜一時游賞非久居處也江陵西為大
關嶺嶺北為五臺于筒之水於是乎出寔為漢江之
源大關嶺之南歷雙溪白鳳兩嶺為頭陀山上有古
人所築石城下有重峯寺寺北即江陵臨溪驛高麗
時李承休隱此而近者故察訪李蓄不仕而築室其
中山中小開平原有水田且溪澗巖石絕勝宜耕且
宜魚是別一洞天也溪由寧越上東入邑前臨溪西

麓南為菴善餘良驛于筒之水自北繞村而西崑頗
敞危工長松白沙掩映清波真隱者所居但恨無水
田然村民皆饒給自足溪到寧越邑東與上東水合
又稍西與酒泉江合兩江之內有 端宗莊陵蓋
肅廟於丙子追復位改封陵前建六 臣廟於傍甚盛
意也大抵北自淮陽南至菴善皆亂山深谷水皆西
流入漢江多燒畝耕作水田甚少風氣高寒地瘠民
魯峽村雖有溪山之勝可一時避兵不合世居唯春
川原州差勝春川在麟蹄西水陸西南距漢陽二百
餘里府治北有清平山山中有寺傍有高麗處士李

資玄鶴尔菴故基資玄少時以妃孫不婚官隱居修
道於此及卒寺僧建浮屠藏蛻骨今尚在山南十餘
里臨昭陽江為猶國千年故都局外有牛頭大村漢
武使彭羅通牛頭州即此地也山中濶展平野二江
灌注於中風氣甚固密而山川清曠土地饒沃多世
居士大夫原州在寧越西為監司所治西距漢陽二
百五十里東連嶺峽西接砥平縣山谷間錯開原野
明秀而不甚險阻介畿嶺間輸東海漁鹽人菴棺擲
宮殿之村為一道都會近峽有事易以隱避近京無
事可以進取故漢陽士大夫多樂居於此東有赤岳

麗末耘谷元天錫隱居於此教授諸生我太祖在
潛邸時使恭靖大王以總角往學於耘谷學成而
歸十八中制科及太祖威化回軍有禪代之漸耘
谷作書諫之久之恭定大王又登極幸赤岳訪耘
谷耘谷避不見只留昔日炊婢老嫗上問先生去
處嫗答以往太白山尋友矣上仍厚賚嫗以耘谷
子授沂川縣監留官誥而去人謂高過嚴陵非桓榮
淺淺者可比北有橫城縣邑沿峽中開拓晃然昭曠
山綠水平別有一種難形之清氣境內亦多世居士
大夫東北受五臺以西水西南至原州為瞻江入于

興元倉南與忠州下流合村在二江間以二江為龍
虎紐結於村前為深潭而五臺西赤岳之脉至此大
畫江外山関鎖於左右地理最佳茲為一道通京輸
會之地多世居士大夫亦以舟商致富厚者昔光海
朝白沙李恒福以蹤跡託鄭忠信相上流退去
處忠信至此畫地形以獻白沙欲卜築而會謫北青
不果余嘗過此憶白沙事有詩曰俛仰江山似昔年
英雄眼力故依然西風恐污王孫畫欲徒全家上水
邊然地邊兩江無水田不能無農利村東南踰崗麓
為德隱村西與忠州青龍里接山谷間多水田泉石

清幽亦可隱居鐵嶺金剛之水南下為春川牟津江
至龍津入于漢江而自春川渡江而西有揚口金化
金城鐵原平康安峽伊川七邑皆在京畿之北黃海
之東其中鐵原府為秦封王弓裔所都弓裔者新羅
王子小無賴長為賊於竹山安城之間據有高句麗
穢貊之地自稱王以殘虐為其下所逐而王太祖建
遂為羣下所推戴是高麗之驅除耳邑雖隸江原即
野邑西與京畿長湍接壤土雖瘠大野孱山平濶明
朗在二江內亦峽中一都會也然野中水深而黑石
如虫蝕是可訝異自漢陽東渡龍津歷楊根砥平踰

葛峴則為江原境又東行一日程則為江陵府西境
雲橋驛昔余先大人癸未間出守江陵余時年十四
隨板輿行自雲橋至府西大關嶺毋論平地高嶺路
在萬木中仰不見天日者凡四日程自數十年前山
野皆被開懇為耕稼場而村落相接山無寸木矣以
此推之他邑亦可知其同然可見 聖代生齒之漸
繁而山川亦少勞困矣舊產人羣處皆嶺西深窅山
童野燒故羣出漸罕每水滂山崩流入漢江而漢水
漸淺矣

慶尚道地理最佳自江原之南西與忠清全羅接界

北有太白山堪輿家謂漲天水星左出一大枝薄東
海止於東萊海上右出一大枝為小白鵲城主屹曦
陽青華俗離黃岳德裕智異等山止於南海上兩枝
間沃野千里潢池天成之澤自太白山上峯下穿山
而出自北南下至禮安東折而西循安東之南至龍
宮咸昌界始南折而為洛東江洛東者謂尚州之東
也江入於金海劃居一道中央江東謂之左道江西
謂之右道兩枝又大合於金海七十一州同一水口
作大局上古內有百里之國甚多至新羅出而伐取
諸國以一之新羅享國千年都慶州古所謂雞林君

子國也今稱東京置府尹以莅之州治在太白山左
枝中央形家言回龍顧祖向西北開局局中之水東
流為江入於海有新羅時半月城鮑石亭桂陵故基
新羅既盡取嶺南諸國而又覲麗濟之亡統一三國
矣末葉女主當宇政令不行崇佛太過寺刹遍於山
谷齊民化為緇髡而弓裔據鐵原甄萱叛全州至麗
太祖出而混一麗濟則新羅又納土歸附矣新羅時
北阻大氏及契丹專以海路朝唐冠蓋相屬聲名文
物慕效中國頗斐然可尚自高麗至我朝又幾千
年上下數千年一道之內多出將相公卿文章德行

之士與夫立勲守節之人仙釋道流踰為人材府庫
我朝則 宣廟以前東國者皆是道人四賢從祀文
廟者又是道人 仁廟與栗谷牛溪門人及白沙門
生子弟靖亂自是偏用京城世家今百年之間自顯
南為判書者二人為亞卿者四五人無拜相者高不
過三品下不過州縣然古先輩遺風餘澤至今未泯
俗尚禮讓文物至今科第之多甲於他道然左道士
瘠民貧雖儉嗇而多文士右道士沃民富喜豪侈而
媮惰不力於文學故少貴顯之士此其大較也然土
地饒瘠或錯異人才亦錯出矣禮安安東順興榮川

醴泉等邑在太白小白之南茲為神臯福地而泰山
之下平山廣野明秀清朗白沙堅土氣色宛然如漢
陽禮安卽是漢李滉之鄉也安東卽西崖柳成龍之
鄉鄉人卽所居並立祠俎豆之故茲五邑隣比相近
最多士大夫而皆是溪西崖之門人子孫也明倫義
重道德雖孤殘里輒有讀書聲鶉衣甕牖亦皆談道
德性命矣然近浸衰薄愿謹而拘礙齷齪少實而喜
口舌爭競亦可見古今之不相及也然左道諸邑皆
不及此安東府治在花山之南潢水自良至青松邑
則川從臨河至合于巽方繞城而西南有暎湖樓高

麗恭愍王南遷時宴游於此樓口其扁額卽恭愍王
筆也樓北有新羅時古刹今廢而無僧其正殿離立
野中不少傾圮人比之魯靈光西有西岳寺寺有闕
帝廟石像卽壬辰天將討倭時所建東南有歸來亭
卽古留守李汝所建東有臨清閣卽李卽世居也與
映湖樓並為邑中名勝自州北可二百里許為太白
山山下有奈城春陽才山召川四村皆深峽峽氓保
聚通江原魚鹽之利而又可以避兵避世四村東有
英陽真寶二縣大同俗而自真寶東踰泣嶺則卽寧
海地也北與江原平海接壤自安東南渡潢水有八

公山山北潢南有義城等八九邑其東南則慶州北
自寧海南至東萊凡九邑在嶺脊之外亦南北長而
東西狹並逼海有漁鹽之利而慶州於九邑中為一
大都會也地尚有故都謠俗入我 朝為晦齋李彥
迪之鄉公山南大丘西漆谷東南為河陽慶山慈仁
等邑一道無可以守城者唯漆谷邑治城郭在萬仞
山上截臨南北大路為要害巨防大立卽監司所治
也四山高塞中藏大野野中為琴湖江自東入西合
于洛東下流邑治在江之陰處一道中央南北道里
甚均亦形勝都會之地也大丘東南至東萊有八邑

土雖沃近倭不可居惟密陽為佔俾金宗直之鄉玄
風為寒暄金宏弼之鄉也挾江面與海近有魚鹽舟
船之利亦繁華勝地也漢陽譯人輩多宿留重貨於
此與倭通互市之利密陽東南為東萊即東南海上
自倭登陸地初境也自壬辰前於邑南海上創置一
倭館周圍數十里設木柵為限置卒以防之禁我國
出交通而每歲對馬島人受島主文引數百人來留
館中 朝家割慶尚租稅若干與之所留倭以一半
貢于島主以一半廩用無所事只掌彼此書信與財
貨交易之事而亦不即與價以次約年歲流割謂之

被執倭一國皆瘴泉多土疾若以人蔘投水盆則瘴
濁融化故最重人蔘深處倭皆購得於馬島 朝家
歲有頒賜定數而嚴禁私商然以利重故雖誅之不
能禁近來邦禁漸弛犯者衆而我國人蔘日漸翔貴
矣昔 莊獻大王時遣將討對馬島而平之不置官
守而居兩國間借倭而要於我借我而又見重於倭
為蝙蝠之役自網其利討而臣屬之上也不然則使
島主歲一來朝而臣服則當以賞賜例厚遺之如前
額可也而至於築館留餼輸賦與之比則殆近貢獻
名號不正可亟罷也蓋馬島土甚薄人稠衆麗末起

而為盜於海上者皆此島人也或欲其安之而不使
為盜然姑息苟且古無如此之例况既在境內又有
變服學語伺察國事之慮壬辰又無故撤歸亦可見
毫不得力於兩國戰爭之際而反有害焉然行之已
久又不可卒遽生梗此當先之兵威而後更以約束
也右道聞慶在鳥嶺下北有主屹之險南有犬灘之
固西有曦陽青華東有天柱大院四山中頗開野為
嶺南界首邑當南北大路壬辰之北上也至犬灘大
畏之調知其無守然後始過至鳥嶺亦然然巖邑而
在重險中堪輿家謂小脫殺南則為咸昌之野咸昌

之南為尚州尚州一名洛陽嶺下一大都會也山雄
野濶而北近鳥嶺通忠州京畿東臨洛東通金海東
萊馬運船載為南北水陸走集便於貿遷故地多富
厚者又多名儒顯官鄭愚伏經世李蒼石坡皆是邑
人州西則火嶺嶺西即忠清報恩地火嶺為蘓齋盧
守慎之鄉東則仁同為旅軒張顯光之鄉南則善山
山川北尚尤清明穎秀故諺曰朝鮮人才半在嶺南
嶺南人才半在一善故舊多文學之士壬辰天兵之
過此也術士忌外國多才使兵卒斷邑後脉熾炭炭
之又以大鐵釘釘之歷任而自是人才衰薈不出金

山西卽秋風嶺嶺西卽黃澗地黃岳德裕以東水合
為甘川東入于洛東臨川為邑者知禮金山開寧與
善山俱享灌溉之利田極膏腴人民安土畏罪遠邪
故多世居士大夫金山卽崔判書善門之鄉善山有
金烏山卽吉注書丹之鄉崔立節魯山吉立節前朝
甘川南則為禪石山山南則星州高靈卽古伽倻國
也又南則為陝川並在伽倻之東而三邑水田為嶺
南最上腴少種多收故土著並富饒無流移者星州
則山川明秀自麗多聞人顯士至我朝東岡金宇
顯寒江鄭述並是州人陝川南則三嘉南溟曹植之

鄉金宇顯鄭述與鄭仁弘皆南溟門人也仁弘乃以
學者自名而尊南溟攻退溪從游者甚衆四隣多被
其誤及東岡之致政歸也避仁弘不歸星州而下居
於清州昂坐山下以終仁弘光海朝為大北領袖官
至議政至仁祖反正裁仁弘於市然星州人士喜
治行義保家是兩岡餘澤也德裕東南為安陰縣是
桐溪鄭蘊之鄉官至吏叅丙子清兵之圍南漢也蘊
以為不可背明降清仁祖下城蘊以刀刺腹而
絕其子弟納腸縫之久而得甦及清兵之回卽還鄉
終身不復仕於朝安陰東居昌南咸陽山陰在智異

北四邑並土沃而咸陽則尤稱山水窟與居安並稱
名鄉唯山陰陰晦不可居四邑之水合為潛江循晉
州邑南入于洛東晉州在智異東為大邑多出將相
之材士肥而且有江山之槩士大夫誇富豪喜治第
宅亭臺雖不仕官有遊閑公子之名壬辰邑為倭陷
倡義使金千鎰兵使崔慶會死之士人立祠祀之
朝家賜額忠烈祠以褒獎 肅廟朝牧使某欲重修
廟宇請助於兵使不聽牧使獨捐俸修飾廟貌一新
牧使夜夢衆武將致謝且曰公文官而尚念吾輩彼
兵使以武將不之顧當治其罪及曉聞兵使夜間暴

死鬼神之理不可謂無州東為宜寧草溪與晉州大
同俗潛江南十三邑自古少顯迫海隣倭水泉皆瘴
不可居惟河東為一壺鄭汝昌之鄉也在智異南與
全羅光陽縣接界故曰左貴右富間多千年名村然
地僻遠於京城非本土人士大夫未易遽往不但勢
不可往也時亦不可往也

全羅道東與慶尚接界北則忠清本百濟後百濟甄
萱麗末據其地與麗太祖屢攻戰麗祖數嘗危殆及
平甄氏惡百濟人以為車嶺以南水皆背走遺命勿
用車嶺以南人至中葉間有登宰相者然罕少入我

朝此禁遂弛然地饒沃西南濱海有魚鹽粳稻絲絮
芋楮竹木橘柚之利俗尚聲色富侈人多儂薄傾巧
而不重文學以故科第顯達遜於慶尚蓋人少以文
行砥礪自名故也然人傑地靈亦自不少奇高峯大
升光州人李一齋恒扶安人金河西麟厚長城人並
以道學稱高霽峯敬命金健齋千鎰俱光州人並以
節義稱尹孤山善道海南人李默齋尚馨南原人並
以文學稱鄭將軍智鄭錦南忠信並光州人亦以將
帥稱吳資成德謙光州人李議政尚真全州人以宰
相顯達文翰則古阜白玉峯光勳靈巖崔孤竹慶昌

寓居則申府尹末舟居淳昌李二相繼孟居金堤李
判書後白居海南林判書壇居務安舟學則南宮道
士斗咸悅人權青霞克中古阜人又以脛煉方術著
名此皆磊落雄俊揚名於後世者也德裕山在忠清
慶尚全羅三道之交會西出一枝至全州東為馬耳
山雙石峯聳秀入天昔 恭定大王講武於湖南以
形肖命名自馬耳一脉西南行從任實全州之交一
西為金溝母岳止於萬頃東津二水之內一西南為
淳昌復興山為井邑蘆嶺是為南北通行大路自嶺
分去西止靈光西南止務安北止扶安卞山又東南

為潭陽光州以下之山復興居一道中央挾兩山開
野大作洞府溪水東流人謂可置城邑 肅廟朝欲
移兵營於此而未果馬耳北行為珠萃山在鎮安全
州之間西出一脉為全州府是為監司所治東為威
鳳山城稍北為麒麟峯出一脉至府西北為乾止山
諺傳 祖陵所在 當于庚戌令監司盡移民塚限
十里封標禁養乾止一脉西去為德池極深濶過池
而又為平岡盤回於大野遂受萬馬洞水地理極佳
實為可居處珠萃以西諸谷之水由高山縣入全州
境為粟潭良田浦五百洲大溪灌溉土為上腴有稻

魚薑芋竹柿之利千村萬落養生之具畢備西斜灘
通舟船魚鹽府治人物稠衆貨財委積與京城無異
誠一大都會也蘆嶺以北十餘邑皆有瘴氣惟全州
清涼最為可居珠萃北一枝西下為炭峴龍華止沃
溝炭峴外西北有礪山等五色礪山則與忠清恩津
接壤土粘有瘴不可居龍華山上有箕準故都城闕
形止而一枝北走礪山西北為彩雲山一孤峯特立
野中上有養蔭靈泉相傳百濟時義慈遊宴處由彩
雲渡一小壩為黃山村石山臨江陡起與恩津江景
村隔一小浦通舟船為勝地西則龍安咸悅臨陂而

並在鎮江之南惟臨陂五城山特秀異近江開局有
西枝浦大村為舟楫停泊之所江景黃山並稱江上
名村臨陂西則沃溝臨西海有白天臺一小麓直入
海汀而上有二石籠新羅時崔孤雲為太守也藏秘
書於籠中即以巨巖委置籠上人不敢開人或牽動
則海上風雨暴至村民利之每旱乾聚數百人用大
繩曳之則海兩驟注田疇霑足每使客至縣輒往觀
之頗為邑弊縣人苦之舊有亭百年前毀其亭且瘞
石籠以泯其迹而今無往觀者炭峴之東為高山縣
龍華之南為益山郡並有瘴而高山山水尤險惡土

雖沃決不可居毋岳之西為金溝萬頃二縣水泉頗
清而山亦脫殺紆迴於野中二水閔鎖氣脉不解頗
多可居處其餘近山泰仁古阜及濱海扶安茂長等
諸邑舉皆有瘴唯扶安卞山之傍興德長池之下土
地既沃又有湖山之景繁就其中擇無瘴泉之處則
此可以居止蘆嶺之西為靈光咸平務安南為長城
羅州此五邑水泉無瘴不比蘆北靈光法聖浦水潮
至滙滄於面前湖山婉宕閭閻擲此人謂小西湖近
海列邑皆置倉於此為捧米漕轉之所長城亦沃壤
而山水又佳羅州為嶺下一都倉背負錦城山南臨

靈山江邑治局勢恰似漢陽自古多名宦之家靈山
江西流為務安木浦沿江多名勝村塢渡江為大野
東接光州南通靈巖風氣恢暢物衆地大村落星布
且縮西南江海輸會之利與光州並稱名邑羅州西
為七山海舊深近為淤所壅漸淺每潮至不過沒
膝中央一道如江舟從此行羅州西南為靈巖郡郡
處於月出山下月出山極意清秀為次星朝天南則
為月南村西則為鳩林村並新羅時古名村也地處
西南海交角之上新羅朝唐皆於此海上發船乘一
日海至黑山島自黑山乘一日海至紅衣島又乘一

日至可佳島良風三日乃至台州寧波府定海縣苟
風順則一日可至南宋之通高麗亦自定海縣海上
發船七日而可至麗境登陸則此地也唐時新羅人
浮海入唐如通津要路舟船絡繹崔孤雲致遠金可
紀崔承佑附高船入唐並中唐制科孤雲為高駢從
事長於四六今儷文所載黃巢檄即孤雲筆也孤雲
與金崔兩人逢申天師於終南山寺得內丹秘訣後
歸東國並脩鍊得仙復與東為任實淳昌南原求禮
並山郡也馬耳南洞之水由任實至南原合蓼川為
孺水鴨津水西即玉果同福谷城也水自鴨津始東

折而為岳陽江通南海潮汐循智異南為蟾津南入于海是以蟾津為全慶分界而南原城郭即壬辰天將楊元所築而丁酉為倭所陷地尚有隱隱殺氣東踰一嶺即雲峰縣在智異山北八良峙上即全慶通行之大路也邑山有荒山麗末太祖大殲倭寇於此府東南為星園有崔氏世居頗有溪山之致又南為求禮縣自星園至求禮通為一野多畝種水田求禮西有鳳洞泉石之奇東有華巖燕谷之勝南則為九灣村自任實至求禮沿江上下名區勝槩又多大村塢唯九灣臨溪水上江山土地與舸艤魚鹽之利

最為可居處也然南原求禮皆在智異山西與水西三邑並舊有瘴稱惡土近少有清涼云復興南支由潭陽昌平為光州無等山山東玉果三邑西南為光州和順南平綾州在靈巖東北唯光州西通羅州風氣遠敞自古多名勝之村亦多貴顯之人靈巖東南海上有八邑大同俗唯海南康津縮耽羅出海之口有馬牛草皮珠貝橘柚駿竹之類然八邑俱地踔遠逼南海冬月草不凋虫不蟄山嵐海氣蒸為瘴癘且密通日本土雖膏沃非可居樂土也自海南縣三洲院石脈渡海為瑠島郡水路三十里而碧波亭寶窟

其口水中石脉自院至亭橫亘如梁而梁上梁下截如階級海水至此日夜自東趨西如垂瀑而甚急壬辰倭僧玄蘊至平壤抵書義州行在所曰水軍十萬又從西海來當水陸並進不審大王龍取自此何之云云時倭水軍自南海北上水軍大將李舜臣任劄海上打鐵鎖橫亘於石梁上以俟之倭船至梁上冒於鐵鎖倒覆於梁下梁上船不見低處不知其倒覆意其踰梁而順流直下皆倒覆且水勢近梁蓋急船已入急流中不暇回旋五百餘艘一時全沒隻甲不存蓋其時沈惟敬給倭使久留平壤倭則欲待

水軍偕上故又佯示守信欲給之以須後而水軍久不至李如松於兩相給中得間而襲破之此天也苟非舜臣覆倭於洋中則不越數十日倭山可通平壤水軍至則倭豈守惟敬之約而不縱兵乎其時人不知此以區區封貢之說謂可得倭情良可哂也然則如松平壤之功卽舜臣之力也其後天將陳璘倭兵海上丙申丁酉間倭以水軍連犯海上諸縣舜臣善水戰屢破倭獲倭首級輒以與璘使上功璘大喜移書朝堂曰統制使有經天緯地之才補天浴日之功云云璘以舜臣故得賊級最多及戊戌撤歸璘所上

首級獨多於諸天將後見明史論東征功以璘為首
而至裂土受封中國人又何知此為舜臣之功也揚
錫有功而被逮璘因人成功而獨受豐賞 皇朝賞
罰之顛倒有如是矣大抵全羅一道在國之最南土
產饒沃然而山郡以川溪灌漑故少歉多收海邑以
隄陂灌漑而自新羅以來大隄陂入我 朝無不廢
棄故數旱而少收昔涑水公稱閩人狡險至朱子時
賢者輩出苟賢者居之因其富饒之業教以禮樂文
行亦非不可居之地且山川多而自麗至鮮不甚顯
達此亦當一番鍾毓但即今地遠俗渝不可居

忠清道在京畿全羅之間西與海接東與慶尚接東
北角忠州等邑斗入江原之南南一半在車嶺之南
近全羅北一半在車嶺之北隣京畿物產之多不及
二南然山川平嫩居國之近南茲為衣冠淵藪京城
勢家無不置田宅於道內以為根本之地且其風俗
近京與京城無甚異故最可擇而居之忠清監司治
公州即百濟末唐劉仁願所置熊津都督府也距漢
陽三百里在車嶺之南錦水之陰自公州渡錦水踰
車嶺歷天安稷山北至京畿陽城從水原果川以至
京師沿路稷山以北皆野散土瘠多草寇不可居忠

清則內浦為上自公州西北可二百里有加倭山西則大海北則與京畿海邑隔一大澤即西海之斗入處東則為大野野中又有一大浦名曰由宮津非候潮則不可用船南則隔烏棲山乃伽倭之所從來也且從烏棲東南通公州伽倭前後有十縣俱號為內浦地勢斗絕一隅且不當孔道故壬辰丙子南北二亂俱不到土地饒沃墳衍平廣魚鹽至賤多富人又多士大夫世居然近海多瘡腫山川雖平善迤濶少秀拔之意丘陵原隰雖嫩軟細小而乏泉石奇勝之景致其中惟保寧山水最勝縣西置水軍節度營

有永保亭湖山景致婉宕平濶號稱勝地北則結城海美西隔一大浦為安眠島三邑在伽倭西又北則泰安瑞山與江華南北相對東為洪州而隔一小海瑞山東則沔川唐津東隔大浦為牙山北斜與京畿南陽花梁隔小海相對此四邑在伽倭北伽倭山東為洪州德山並在由宮之西與浦東禮山新昌舟船通漢陽甚捷洪州東南為大興青陽大興即百濟任存城茲十一邑並在烏棲以北烏棲以前一脉西南行為聖住山山西則庇仁藍浦土極膏腴西臨大海有魚鹽粳稻之利山南則舒川韓山林川臨鎮江地

宜苧苧利甲於一國居江海間舟船之利不下漢陽
鎮江南即全羅境也山東北有鴻山定山鴻在林川
北東與江景隔江定在青陽東與公山接境茲七邑
大同俗又多士大夫世居者而唯青陽定山二邑皆
瘴泉不可居公州境界甚廣跨據錦水南北土人為
之諺曰一儒城二敬天三利仁四維鳩言可居處也
州東南四十里為鷄龍山即全羅馬耳之畫脉也在
錦江南山一枝西下大折為板峙起而為月城山為
州之鎮山錦水自東至州北南折而為熊津為白馬
江為江景江又西折而為鎮江入于海自州東循江

南岿鷄龍背後踰重嶺為儒城大野即雞龍良維也
雞龍南洞國初欲都而未果是洞之水畫一野之中
自西流東與琺山玉溪合北入錦江名甲川川東即
懷德縣西即儒城村及鎮岑縣也東西兩山自南抱
野至此合又高障四山環圍野中平岡委蛇嫩麗精
秀九峯山與寶文山聳峙於南清明氣像殆過漢陽
東郊田地極善且廣但海汀稍遠西仰江景之輸易
然江景不滿百里雞龍坤維有四邑皆在大野中西
限江景津北與公州接雞龍四連峯一枝西下為敬
天村在板峴南上沃山雄民物富盛東則公州大庄

村西則尼城石城二縣又南則連山恩津二縣也尼
連近山土沃恩石處野土薄數被水旱之災此四邑
與敬天通為一野海潮從江景出入野中諸川谷通
舟船之利江景在恩津西野中一小山臨江斗起向
東遂受二大川於左右後背大江通潮而味不甚鹹
村無井一村埋大甕於地汲江水入甕留數日濁滓
下墜上則清爽雖多日味不變愈久愈冽數十年得
瘴者一年飲此水則輒去根或曰江海相和處半鹹
半淡之水最已土疾而此江水為上云恩津南有沙
梯川東南通瑯山境乃八十里長谷而皆瘴泉瘴土

不可居公州西南為扶餘縣臨白馬江即百濟故都
有釣龍臺落花巖自溫臺阜蘭寺並百濟古跡而臨
江巖壁奇秀景致絕勝且土地極沃多富厚者若以
都論之則局小隘淺不及平壤慶州遠矣利仁驛在
扶餘東北公州之西山平野坦水田饒沃亦稱可居
地也錦水之北東嶺之南雖土沃山不脫殺然臨錦
水為亭者有四松錦壁獨樂四松即吾家錦壁為趙
尚書庄獨樂為林氏舊物並有江山之勝登眺之致
州西北有茂盛即車嶺西枝所結土山盤互內有麻
谷寺維鳩驛洞壑多澗水而水田饒沃又宜木綿黍

粟士大夫與平民一居於此不知年歲豐凶多保全
富厚而少流離遷徙之患蓋樂土也地為山上結局
然岡壠依回平善無險屬尖觸之狀峯腰以上無片
石少殺氣故南師古十勝記以維麻兩水間為避兵
地西踰一峴即內浦也內浦不宜木綿海戶浦淑之
民以魚鹽多質綿於此故公州唯維鳩館內浦魚鹽
之利是以平時亂世皆可居然地在山上結作故不
見朝山而小清明秀拔之意此其不及儒城也邑北
有小山盤結於江上形如公字州之得名以此也緣
山形築一小城以江為濠地小而形固昔 仁廟甲

子避迨兵幸此上有雙樹 上每倚此樹北望弓院
之野一日飛騎至詢之乃捷書也 上大喜仍封雙
樹加以通政大夫之號後自官建小亭於山上今樹
枯而亭存城中積糧餉修兵器與江華廣州俱屹然
為地城北有拱北樓頗壯麗臨水為勝 宣廟朝柳
西凋根為監司嘗登樓賦詩得一聯曰蘓仙赤壁今
蒼壁度亮南樓是北樓蓋蒼壁在錦江上流而樓名
拱北也人謂徐凝惡詩而西凋自謂佳句俗離山南
走大斷於秋風嶺起為黃澗黃岳山入全羅為茂朱
德裕山又自德裕大斷於長水南原間西去為任實

馬耳山自此石山一脉遂而北走為珠旒山雲梯山
大芑山入忠清道背錦水而回為雞龍山向南背北
通為大嶺一泐德裕馬耳之間東西諸邑川壑之水
合為錦江之源名赤登江自南北走至沃川東又合
俗離之水西折而為錦江赤登之東為長水茂朱永
同黃澗青山報恩西則為鎮安龍潭錦山沃川而長
水茂朱錦山龍潭鎮安為全羅境沃川報恩青山永
同黃澗為忠清境茂朱長水在德裕山下多穹林邃
壑山勢鬱拂永同在俗離德裕二山之間東有秋風
嶺嶺為德裕過脉息氣處名雖嶺實則平地故山雖

多不甚麓壯亦不甚低平而巖石峯巒俱韋澗澤和
淑之氣溪澗清澄可愛無粗惡驚急之狀土亦肥厚
水多易漑少旱災青山亦然北接報恩而報恩土甚
薄唯館堂在俗離南甌項西野澗土沃最宜可居二
邑俱宜棗民以賣棗為業報恩北懷仁縣在萬山中
邑至小而有楓溪村可居鎮安在馬耳山下土宜烟
草凡係境內則雖高山絕頂種之無不茂茁居人多
以此為業北則龍潭溪山奇勝有珠萃川半日巖可
以避兵其北則錦山又北則沃川也錦沃亦多石山
然皆於野中離立沃川北限錦江西與懷德隔一嶺

山川精潔土色明秀如漢陽東郊故野甚瘠薄水田少收居人唯種綿為業蓋寂宜綿也然自古多出文學之士南學士秀文及宋元齋時烈皆是郡人也錦山則東限赤江西限大宅中間有釣溪進樂二山又多大川易灌溉故田土頗饒兼有水石之勝於十邑中最可居也俗離山在清州東百里山上之水東注者入慶尚洛東西注者入錦江北注者為忠州達川入漢江山脈一枝北走為巨大嶺夾達川西北至京畿竹山境為七長山自七山循漢水西北行者故為漢南諸山西南行者為一嶺脈在鎮川則為大門嶺

在木川則為磨日嶺大斷於全義邑為平地至錦江北為車嶺又西為武城山烏棲山南止於林川韓山北止於泰安瑞山磨日嶺以東巨大嶺以西中間大野東西二山之水合于野中為鵲川鵲川發源於鎮川七亭東南入于錦江上流芙蓉津鵲川之西傍西山者木川全義燕岐川東傍東山者清安清州文義其中清州最大在公州東北百里邑在巨大嶺下地越鵲川西介入木川燕岐之間止于西山西山一帶委蛇南下者皆土山無石盤互於鵲川以西北自木川全義南至燕岐山色紆揚婉媚野勢重複回互堪

輿謂之脫殺比錦沃尤平善土地甚肥沃宜五穀綿
絮鵲川之東為大野東南通四十餘里野中有一山
八峯名八峯山自南向西北岡麓盤據野中東與巨
大嶺相對白沙淺川平岡嫩麓恰似京畿長湍邑西
向地低而南水高歲患漂圯麓末鄭道傳以宰相為
太祖謀臣忌收隱李穡陶隱李崇仁諸賢自流所拿
致清州獄遣官莅鞠方訊囚晴日大雨暴下頃刻水
冲城門至官庭獄官及罪人攀庭樹莖免事聞 太
祖亦知其寃命釋之然崇仁被道傳所忌尤甚竟殺
之地東高北虛隱隱恒有殺氣州置兵馬節度營及

戊申賊將李麟佐起兵夜襲殺兵使李鳳祥營將南
延年遂據城反留其黨申天永為兵使盡起邑兵北
上至安城為巡撫使吳命恒所敗東踰巨大嶺則為
上黨山城又東則為青川倉倉西為申氏之村南踰
小嶺為引風亭玉流臺為予所居大山間川洞巖石
頗有幽致又東渡大溪則為龜灣溪山絕勝上黨青
川通謂之山東而地在山上風凄寒不及清州之野
南有俗離東阻仙游北則俗離之北去者彎環曲抱
障北通南內多名村塢地產鐵且饒棺槨官室之材
野中人皆於此貿遷自青川東北數十里有松面村

在聞慶清州槐山三邑之交溪山頗佳青川之南有龍華洞西南逼近俗離而不甚險小開郊垌然土甚薄有峽氓保聚南粟峙龍華之水與俗離之水合于青川北注槐江松溪南北上下多臨溪為勝者北鎮川鎮川則北清州少野而多山山谷回複而又多大川然皆無拂鬱之氣土頗沃西北踰大門嶺則為安城稷山地海門堇百里故亦通魚鹽之利文義則南臨荆江山色少蒼鬱然臨江多勝地唯清安山水鄙野不可居自木川磨日嶺以西內浦以東車嶺以北有天安稷山平澤牙山新昌溫陽禮山等七邑大同

俗然南則山峽近山峽則土沃宜五穀木綿北則浦淑近浦淑則土鹵沃相半雖有魚鹽舟楫之利不宜木綿天稷則為南北大路自稷山行平原二十里盡而為素沙河河北即京畿界昔宣廟丁酉倭破楊元於南原從全州北上公州兵勢甚盛時邢玠以提督任遼東經理楊鎬率十萬兵新次平壤方夕食於鍊光亭工飛馬報至鎬下筋一聲砲即上馬南下馬軍踉蹌先隨而步軍又隨後自平壤至漢陽七百里而一日二夜馳到使獐將解生攜貴賚揚登山等四將率鐵騎四千挾弄猿數百騎狙伏於素沙橋下

原盡處望見倭自稷山如林而北未至百餘步先縱
弄猿猿騎馬持鞭鞭馬突至倭陣倭國本無猿始見
猿似人非人咸疑恠之任陣而停足眄望既逼猿即
下馬入陣中倭欲擒擊猿善躲閃貫一陣陣亂解生
等遂縱鐵騎蹂之倭不及一銃夫而大崩潰南走伏
尸蔽野捷至鎬始整兵南追至慶尚海上自倭犯順
未有若此之衄其揮霍之謀節制之功過如松平壤
之戰而主事丁應泰憤鎬不闕由於已而獨成功誣
奏偽捷鎬遂被劾去以此一事見之知 皇朝之不
可為矣 宣廟叅使為鎬下誣應泰雖革職而然丁

附東林其子訟父寃於東林黨中錢牧齋信之而記
之於集中亦可見東林之虛踈而君子之易欺也野
中耕者至今或得刀劍戈戟之屬由官浦至此與素
沙河合兩水交會間為牙山縣七長大脉至稷山聖
居山撇下一脉於野中由成歡驛西止於牙山靈仁
山即縣之鎮山也山自東南向西北而素沙河下流
至是滙滄於面前背後曲橋大川自東南來來會于
西北戍方合為大湖湖南一山自新昌至湖北一山
自水原至而交紐於水口如門水出門即與由官浦
下流合水而合公山如大船掛帆全身皆石而屹立

於中流如渤海之碣石朝家置倉於靈仁山北地盡
頭收忠清近海諸邑賦稅歲漕至京師故名為貢稅
湖地本饒魚鹽而以倉故人民多聚商賈萃會多富
厚之家不但倉村為然靈仁山既止二水間而氣脉
不鮮左右前後皆名村多士大夫之家由宮浦東西
諸邑皆通舟商而其中唯禮山為居留都會之所車
嶺西去者北離為廣德山自廣德又離為雪羅山在
溫陽東如閩中蒲田壺公山秀出天中形如卓笏以
此山為東南吉方者牙山溫陽諸村多出顯達文學
之士忠州在清州東北百餘里自清州踰清安掄嶺

歷槐山渡達川為邑治在漢陽東南三百里俗離九
選八谷之水北至清州山東為青川至槐山為槐江
至邑治西為達川北至金遷前與清風江合壬辰天
將過達川也嘗水味曰與廬山水簾洞同云邑為漢
水上流水路便於往來故京城士大夫自古多卜居
於此至達川南沂至槐江東沂至清風而多士大夫
亭閣衣冠聚會舟車走集且居國都巽方故一邑科
第之多甲於八路諸邑足稱名都然慶尚左道由竹
嶺通右道由鳥嶺通而二嶺之路皆會於邑治而水
陸俱通漢陽故邑治獨當畿嶺往來之衝有事為宅

爭之地而實為一國中央如中國之荊州故壬辰倭之破申砬也亦於此地而常時殺氣衝天白日無光地勢走瀉西北無停蓄之氣故少富厚者而人民稠衆常多口舌浮薄不可居然此以邑治論耳自邑治西渡達川則俗離此行一枝自陰城縣西特起為伽葉山為芙蓉山一止於金遷一止於嘉興餘麓盤互於達川之西地宜五穀木綿土極饒沃山谷間村場錯居多富厚者而其中金遷嘉興最為繁盛金遷則二江合於前而繞出村北東南受嶺南貨物西北通漢陽魚鹽閭閻櫛比恰似漢陽諸江村舳舻聯絡為

一大都會嘉興則在金遷西二十里江自東南趨西北而村在南完芙蓉山一枝達江特起為蓄徽山是為嘉興主山朝家設倉於此收嶺南慶尚七邑嶺外忠清七邑田賦使水運判官漕至京師居民以主客與米出入時射利致奇羨二村亦多科甲貴顯之家伽葉一帶外俗離西行者名小俗離山自此一枝達行為玉帳八聖壽山止於秣馬里即已卯名宰十清金世弼退居之地子孫至今世居而閭閻數百戶皆饒給自足前有大川灌溉水田多畝種故自古少凶歉歲距漢陽莖二百里且通驪江水路實可居處也

土人以金遷嘉興秣馬村與江北內倉為忠州四大村自邑治西北七里許一小山在二江合衿內即新羅時于勒山人彈琴之處以此名彈琴臺自臺渡江而北為北倉有臨江巖石之勝倉西即己卯名賢灘叟李延慶之所居子孫十代科甲不絕人謂江上名基沿江而西為月灘即洪氏所居又西為荷潭即古判書金時讓所居又其西為木溪是為下江魚鹽船停泊出稅之所而東海魚鮮及嶺峽貨物皆聚會於此居民皆以販賣為業致富木溪西即青龍寺洞壑西與原州接壤然東自北倉西至青龍並稱江北諸

村雖有臨江勝槩皆土薄不及大江以南達川西之饒沃矣木溪北十里為內北村是千年名村山中開野風氣閑鎖土地甚廣多世居士大夫東接月隱嶺嶺東即堤川境也忠州東則清風府臨江有寒碧樓頗爽愜而蕪幽眇之致彌謂上流名勝樓府西有黃江村即權遂菴尚夏所居清風東丹陽丹陽北永春三邑並溪洞嶮險少開野處忠州東北為堤川一邑四面山上上結局內則野拓山低晃然明朗亦多世居士大夫然地高風寒土瘠無綿少富多貧北有義林池自新羅築大堤障水以灌一邑之稻田池西

有峽山亭臺卽金氏物也雖不及嶺東諸湖亦足以
浮航以遊北近平倉東接寧越亂山深峽真可以避
兵避世延豐則忠州南槐山東鳥嶺一沔高障東南
雖無溪山之致亦無顯者然土厚易灌水綿為上田
延豐西則槐山地在鳥嶺及榆嶺兩峽之間地勢狹
窄擁腫然頗脫殺東臨大江多勝地名村亦多顯貴
者土地宜五穀木綿地近金遷亦可居處也自此東
踰鳥嶺為聞慶西踰榆嶺卽陰城自陰城西與京畿
竹山陰竹接壤也

京畿竹山驪州之東與忠州接界竹山七長山卓立

於畿湖交界西北行大斷於水踰峴為平地復起為
龍仁負兜山為石城山為光教山自光教西北為冠
岳山直西為修李山以盡於西海自竹山又分一枝
北行由陰竹止於驪州 英陵是唯我 莊獻大王
所藏之地開土時得古標石刻云當藏東方聖人術
士言回龍坐子申水入辰為諸陵中第一云竹山南
有九峯山此山回環可作山城且據畿湖孔道中央
自竹山西由陽城散為漢南諸邑並村落凋弊風水
悲愁無可居處水路則自忠州沿江西下循原州驪
州楊根至廣州北會龍津為漢陽面水驪州邑治在

江之南距漢陽水陸未滿二百里邑西有白涯村一曲長江自巽入艮橫帶於前是為江上茅一名區水口關鎖不知江出與邑村通野東南廣遠氣色清爽二村並多士大夫世居之家然白涯則村人專仰舟楫高取以代農而其贏得優於耕耘之家邑內有清心樓頗得江山之勝江北有神勒寺寺傍有江月軒臨江巖石絕竒江南崖下有馬巖巖下諺傳驪龍所在南則利川陰竹大同俗北則砥平揚根與江原道洪川接壤亂山深峽皆不宜居揚根龍門山北有迷源村昔靜菴趙光祖愛山水欲卜居余常見之矣山

中雖恢拓地既深阻氣亦凄寒四山不雅前溪太咽非樂土也驪州西為廣州石城山一校北走漢江之南州治在萬仞山前即古百濟始祖溫祚王故都也內夷淺而外峻絕清人初起兵不留田丙子終不能陷仁祖下城只以糧少而江華被陷故也及事定視為保障重地建九寺實以僧徒設搃攝一人為僧大將每歲逆各道諸寺丁壯僧使屯守於九寺月課以習射優等者賞以厚祿故僧徒專以弓矢為業蓋朝家以國多僧徒借為守城之資城內則不險而城外則山脚帶殺且重鎮之下有事則為必爭之地故

廣州一境不可居廣州西卽修李山在安山之東自此西北去者為修李最長之脉由仁川富平金浦通津為崩洪石脉渡江而起為摩尼山是為江華府府一境東北環江西南環海為大島為漢陽水口之羅星漢水至通津西南折而為甲串渡又南至摩尼後崩洪處石脉橫亘水中如門闕中央凹陷是為孫石項南則西海大洋三南稅船至項外候潮滿越過少不及周旋船輒冒破漢水之直西者循楊花渡北岸會後西江水又循文殊北入于海江華南北百餘里東西五十里府置留守以莅治北則與豐德昇天浦

隔江江岸皆石壁壁下卽泥濘無泊舟處獨昇天浦對岸一處可泊然非潮滿不可用舟素稱險津而左右不用城郭只築墩臺於山脚臨江處如城之有雉內藏兵器置卒以備寇東自甲串南至孫石項惟甲串可用船渡餘如北岸皆泥濘故亦只於山脚臨江處築墩臺以備寇如北岸一守昇天甲串兩路則島為天塹矣是以高麗避元兵移都十年雖陸地糜爛終不能犯島入我 朝凡三南稅船皆從孫石項上京故為海路要害既置留守而鎮守又設防營於東南對紫水宗島使僉使鎮守 仁廟丁卯清兵至黃

海平山約為兄弟而講和解去時清兵據遼瀋日與
皇朝鬪而毛文龍又鎮撥島我朝亦以海路由登
萊朝貢清人恐我國之議其後先遣間為承政院皂
隸知我國兵力衰弱欲掩襲時朝家亦慮清人之
侵逼修築南漢山城丙子春清人遣龍骨大探視龍
胡欲觀西江仙遊峯時金荷潭時讓為戶判揣知龍
胡欲觀南漢山城令吏卒整待延候於東大門外龍
胡佯向西門忽躍馬出東門見路傍設帳幕候待恠
而問之譯人言戶曹判書知客使將往南漢預治小
宴於路次請客使中停龍胡大驚強笑駐馬仍不往

南漢而還時臺閣多新進少輩不解事而自稱清議
請斬虜使龍胡聞之不辭而歸歸時大書一青字於
館壁而去青字即十二月也是年十二月清人避義
州由昌城乘冰渡鴨綠江經城不攻三日而先鋒至
弘濟院住不入城軍皆解鞍歇馬示若不攻而以待
後軍滿城惶駭兵曹判書崔鳴吉自請持牛酒往犒
問興師之由而以其間先送世子二大君奉廟社
主妃嬪避江華上縹臨南門樓恐為胡所搶改路
入南漢山城清兵大隊至隨而圍之又四五日清皇
帝始至見城高不可猝拔怒欲斬龍胡以龍胡建策

故也龍胡請限十日取江華以贖罪許之於是龍胡率一枝兵到通津文殊山上俯見江華一島如視諸掌而甲串絕無防守遂撤人屋材作筏以渡島遂陷仁祖聞之遂定下城之計先是金瑬為首相意謂江都無虞擢其子慶徵為江華防守大將使率家屬避亂而以李敏求副之慶徵驕駭敏求浮薄無遠慮日蒲博沉醉大君與大臣勸其遣兵守甲串慶徵大言曰胡兵豈能飛渡及城陷大臣金公尚容死之士族婦女殉節者亦多或奔渡海邊投水而死面怕浮水如亂雲而不知其為誰氏女也及亂定或有以被虜

為投水死而旌門者丙子後朝廷懲創前事修器械積蓄糧而為陰雨之備百年無事江華見糧近百萬肅廟末年比歲凶歉多移轉各道為賑恤之資秋後或捧留各邑京各司經費不足又請移米而軍餉歲漸耗縮今不滿十萬石矣 肅廟癸酉侍臣以丙子事奏 上卽命築文殊山城蓋以文殊不守則江華亦不可守也其後廟堂及諸帥臣多請移通津邑治於城內為獨鎮使當亂率一邑兵入保山城竟以議不一未果 當丁丙寅留守金始懌狀請沿江築城許之始懌使築城於東面北自燕尾亭南至孫石項

役畢擢始熾為正卿未幾潦兩城圯而築城時遇平地泥濘輒填以土石作基故江岸皆堅固可通人馬沿江四十里處處皆可泊舟而島始不可守矣江華一脈從西岸行又以崩洪石脈過一浦是為喬桐島為開城外案島北則漢江之水至此為開城面水南臨大海海之南即忠清海美瑞山等地海不遠西岸山皆可望見西北斜與黃海白川延安隔浦相望大雖不及江華而一島全身皆石離立海中朝家設統禦營於此置水軍節度使使率京畿黃海平安三道水軍以備海防然二島並地薄數旱少收而民以魚

鹽資生修李西去者為最短之脈止於安山海上多京城公卿家祖地且近京而饒魚鹽亦多世居士大夫修李南去者西南行止於廣州聲串里為魚鹽浦村頗集近海商船民販魚為業而致富厚東南行為水原府諸山止於海與忠清牙山縣隔浦而中間有金山山頂有池水如染黃相傳金產其中昔唐人望氣者言山有金寶氣云金水別枝又西去為南陽府治由府西文板峴西止於海與忠清唐津隔小海甚近二潮相通地勢左右挾浦港直入海中鹽戶數百星羅於南北海汀盡頭為花梁僉使鎮自鎮渡海十

里為大阜島皆魚戶所居故南陽西村獨擅漢南魚
鹽之利大阜島自花梁行崩洪石脉從海中過去而
石脊屈曲連亘脊上水甚淺昔有鸛鳥從水中石脊
上步去島人隨而得其路蹠為鸛指惟島人熟諳而
他處人不知也丙子島人為胡所逐步從石脊行而
石脊屈曲難尋胡騎不知隨而滄焉島遂獲全島土
沃民衆而為海船南來初程為江華永宗外戶舊設
水軍營及移喬桐為牧馬場無兵備防守此甚不可
宜移花梁鎮於島中使與永宗犄角可也自此西行
水路三十里為燕興島麗末宗室翼靈君琦知麗祚

將亡愛姓名畫室浮海逃匿於此島及麗亡得免浮
水之患子孫仍居今夷為馬場牧子翼靈所居屋三
間封鎖至今謹嚴不許人見內儲書冊器四云而不
知為何物也昔有一官負游賞至島欲開鎖諸牧子
男女哀乞曰聞此則子孫輒有死亡之患故相戒不
敢開者三百年官負怜而止水原東為陽城安城安
城居畿湖海峽之間貨物委輸工商湊集為漢南都
會然邑治外雖平善地有殺氣不可居水原北則果
川白果川北行十五里則為銅雀津渡江而北行十
里為京城南門咸鏡道安邊府鐵嶺一脉南行五六

百里到揚州殘山自艮方斜逗以入忽起為道峯山
萬丈石峯自此向坤方行小斷而又特起為三角山
白雲臺自此南下為萬景臺一枝西南去為白岳形
家言衝天木星為宮城之主東南北皆大江也西通
海潮盤結於衆水都會之間茲為一國山水聚會精
神之處昔羅僧道詵留記以為絙王者李而都於漢
陽故麗中葉使尹瓘相地於白岳之南仍種李及繁
茂輒芟伐以壓勝及我朝使僧無學定都邑之地
無學自白雲臺尋脉到萬景臺西南行至碑峯見一
石碑大刻有無學誤尋到此六字即道詵所立也無

學遂改路從萬景正南脉直到白岳下見三脉合為
一坪遂定宮城之地即麗時種李處也欲築外城周
圍未定一夜天下大雪外積內消太祖異之命從
雪立城址即今城形也雖因山為址震坤位虛且不
設雉不浚濠壬辰丙子二亂皆不能守者在肅廟
乙酉朝家議改築都城或以為東方大依若壅江灌
城則畫為魚鱉議遂寢然茲為三百年聲名文物之
區儒風大振學士輩出儼然一小中華矣揚州抱川
加平永平為東郊高陽積城坡州交河為西郊二郊
俱土薄民貧京城外少可居處士大夫家貧失勢下

三南者能保有家世出郊者寒儉凋殘一二傳之後
多夷為品官平民矣漢陽前面既阻大江獨西一路
通黃海平安而自都城西去五里沙峴踰峴又有絲
磬峴唐將過此時謂一夫當關萬夫莫開云又西行
四十里為碧蹄驛卽壬辰李如松敗兵處也倭自平
壤敗歸漢陽以羸兵弱卒出沒於高陽縣如松至開
城聞之貪其立功任大軍以輕兵掩之纔踰嶺倭四面
大至如松麾下家丁多被斃死天將駱尚忠素多力
弼駱千斤被重鎗挾如松於腋下且戰且走董以身
免如松自此沮喪仍退師及聞倭離漢陽去始整兵

南延至慶尚而還二峴及嶺皆可設關門而一國無
截路作關之處故委棄天險良可惜也自碧蹄嶺西
行四十餘里為臨津渡卽漢陽北江下流而江岸南
一麓如天作城形且當西路要扼臨江絕險真可守
之地而不得不置城處也然至今不築城絕可恨也
渡津由長湍西行四十里為開城府卽高麗國都也
松岳為鎮山而下為蒹月臺宋史所謂依大山立宮
殿者卽此地也金寬毅通編以此地為金豚卧處道
說所謂種稔之地也謹按唐宣宗少時離十六院久
勞於外隨高船渡海至開城後西江北見浦崖泥濘

以舟中所在錢鋪地上登陸故至今獮曰錢鋪自此
至五冠山下寶育家寶育知唐貴人以少女辰義薦
枕臨行知有娠遺一彤弓曰若生男可持此尋中國
東子名作帝建及壯持父所遺彤弓習射精妙從商
船泛海入唐至海中舟僵回不去舟中人大懼約投
笠卜吉凶惟建笠沈水中遂具糧下帝建於島使待
船回建獨在島中一童子自水中出謂曰龍王見請
但瞑目自至建從之至水府見一老翁謂之曰老夫
居此已久而近有一白龍爭窟宅約以明日會戰知
君善射可助吾射彼建曰何以知之曰明日午時風

兩波浪是戰時也戰酣各出背曲青者我也白者彼
也建諾出島伺之翌日果如其言建在島上射中白
者少頃天晴波平童子出而復邀建以少女妻之曰
君貴種也還鄉自有大福久留而并妻送之出島上
則高船至矣遂以龍女歸泊昌陵監白太守聞作帝
建娶龍女至并捐貲出力築室以居之自昌陵又移
居松岳下生一子名隆後以失信責帝建率少女入
井化龍去西海隆又生子別製姓名曰王建實季氏
也王太祖即位即父所居為正殿追尊龍女為溫成
王后作帝建為懿祖其立國適丁五代之初昭宣帝

亡於中國而王太祖興於海外統合三韓子孫享國
五百年此唐太宗之餘烈也如陳亡而田氏大於齊
天之報施可謂不薄矣龍女事人或不信而謗傳太
祖所生子女兩腋或有龍鱗太祖以外家既龍而龍
女歸海時又率少女化龍故恐女子下降輒生王者
女子無鱗者下嫁有鱗者皆令結序之君留為後宮
不顧瀆倫之恥及中葉有以妹為妃者宋史譏之而
殊不知獨王家為然而民俗不然也我太祖威化
回軍後以禍為辛昫子而廢之立恭讓王謚為君又
使恭讓王誅禍於江陵禍臨刑攀腋以示視者曰以

我為辛氏而王氏龍種也腋下鱗鬣等視之觀者
逼視如其言此最殊異洪武壬申我太祖大王受
恭讓王禪移都漢陽王氏之臣世家大族不欲臣服
者皆留不從土人誦其詞曰杜門太祖惡之命限
百年傳士子之科舉留居者傳子至孫遂為平民以
商賈為生而不治士業三百年來遂無士大夫之名
京城士大夫亦無往居者余嘗見大井里故祠溫成
后塑像與昌陵土城每詭異曰以為虛而非真則遺
跡尚班班也以為實而非偽則殆近齊東之語其孰
信之最可痛者鄭道傳以牧隱門人麗末官至宰列

而甘為王儉褚淵之事賣國為利害師我友而既麗
亡又獻策除王氏宗室托以謫置紫燕島中滿載諸
王氏於一大船浮之海而密令泅水者鑿船底沉之
時有一山僧與王氏相親者臨危見之王氏遂吟一
句曰一聲柔櫓滄波外雖有山僧奈若何今其所沉
處沙淤泥生為一海中大島所謂貞州島也在步輦
江下 太祖卽位移恭讓王於關東毀王氏太廟以
木主置大船浮之臨津江船自逆水上至麻田縣江
上佛寺前止縣人以聞 太祖命移佛像於他寺以
木主安於寺號曰崇義殿欲祀王氏為監而王氏有

爵名者前已剪除餘者皆逃匿變姓為馬氏或為金
氏或為王氏皆藏王字於字畫中而然不自認為王
氏故至 莊獻王朝始得王循禮一人依箕子殿解
于氏為監劍錫以土田奴婢使世襲殿奉奉而以奉
其祀此 聖祖之盛德也 聖祖亦嘗曰除王氏非
太祖之意出於功臣之謀云城中有善竹橋卽圃隱
鄭夢周遇害處恭讓王時圃隱以相臣獨不附 太
祖太祖門下諸將使趙英珪以鐵椎推殺於橋上血
痕至今尚存而麗祚遂移矣後 本朝以本朝職銜
議政府領議政立碑龍仁墓前卽雷擊碎之鄭氏子

孫改書高麗門下左侍中職名而至今無事可見忠魂毅
魄之死後不泯也其亦可畏也已城東南十餘里有
德物山山上有崔瑩祠祠有塑像土民祈禱有驗而
祠傍有寢室土人以民間處女侍祠老病則更以少
艾搜之至今三百年如一日侍女自言夜輒降靈交
媾云余曰瑩以無謀之勇夫女為禍妃而謀國不職
斷送社稷於他人之手不升天不入地為神於國郊
之外獨不忘男女之道可見其不服其死而亦可謂
昏淫不明矣然自數十年來其祠絕無靈應亦可訝
矣滿月臺卽一仰面長坡新羅僧道詵留記以為不

毀土培以土石而為宮殿故麗太祖鍊石為層階護
麓身而上立宮殿及麗亡宮殿毀撤而只階礎宛然
久而官不守護開城富商大賈輒盜昇而為墓石近
漸罕存矣臺後有紫霞洞乃松岳之下泉石幽絕城
中辰地有男山卽賊臣崔忠獻所居而崔氏滅恭讓
王建花園八角殿於上王禍之被圍也亦於此處南
有龍首進鳳二山並自松岳流下而為城中內案堪
輿家以進鳳為玉女粧臺之形麗王累世得尚上國
公主以此而英有筆山故國人多占科甲於中國但
虎山強而龍山弱故國無名相而累有武臣之亂亦

以此云城東北有山臺巖卽毅王遇亂處臺西北有
靈通洞卽寶音古居舊有歸法寺今廢焉洞北有花
潭泉石奇絕卽中廟朝徵士徐敬德隱居處也北
踰一嶺卽玄化寺古基今只有碑塔玄化之西為大
興洞卽五冠聖居兩山間大洞天也肅廟朝葉山
城於此外險內坦真天險而官置糗糧兵器創大寺
使僧徒守之以備不虞洞中巖壁嵬峩壯大而澗溪
亦洪深滙渟下為大瀑卽朴淵也府城西門外有萬
壽山麗朝七陵在焉自此北踰小嶺則為青石洞長
谷十餘里屈曲盤回而兩崖壁立千仞大溪中瀉而

山如門戶者屢次清皇帝丙子襲我也至此大畏之
欲殺龍胡龍胡以為必無守訶知乃過及回軍日改
路而從開城東北白峙而去府南則豐德府東則長
湍永平江自東澄波江自北合於麻田循長湍南為
臨津又西會漢江為豐德昇天浦長湍邑治在臨津
北白鶴山下也北有華藏山寺有西域僧指空所留
貝葉經旃檀香華藏以南皆細麗平川自麗至鮮多
公卿墓塚人比之洛陽北印臨津東有漣川麻田北
有翔寧直漢陽北百餘里水道通二京然並土薄民
貧少可居處其中翔寧田地頗善而臨江多勝槩漣

川有許眉叟穆故居

